


# ŽEMAITIŲ

LAIKRAŠTIS  
"A MON SAKAA?"



## ŽEMAITIŠKAM ŽUODIOU IR MINTEE -- PLATIESNI KIELI

Tamstu ronkuos – pėrmasis Žemaitiu kultūras draugėjės ir šiu vasara ikortuos Žemaitiu Akademėjės žornals. Ons išauga iš 1991 metu gegožės mienesie pradieta leisté pėrmuojė Lietuvos žemaitiška laikraštė "A mon sakaa?". Nu šiuol anuo skaitytuojems, vėsėms, kas iduomaujės Žemaitiu krašta istuorėjė, kultūra siūluojem ši žornala. Torem vilti, ka šiu leidėni skaitys ne tik žemaitėe. Dėl tuo čė nevėngsem ir redakcėjėe atsiūstū bėndrėnė lietoviu kalba parašytu straipsniu. Anėi torietom padietė mums geriau sosėpažintė so Žemaitėjės garbinga istuorėjė ir šiū dėinū gyvenėmo, čė dėrbontees, korontees žmuonim. Žornala leid bovusi "A mon sakaa?" laikraštė redakcėjė. Dėl tuo nebūs ožmėrštas ir tuo laikraštė tradicėjės. Atskėrūs žornala skyriūs teesem laikraštie pradietas temas. Be kultūras, istuorėjės, kalbuos skyriu, žornalė torietomem rastė poslapius, skėrtus žemaitiu tautuosakaa, puoezėjėe ir pruozaa, mūsa krašta miestelems, lonkytėnuoms vėituoms, žmuonėms, katrėi sava darbaas pouš mūsa krašta. Te būs mūsa bėndravėms ēlgs, maluonos ir naudings. Nu šiū metu rogpjūtė mienesė "A mon sakaa?" laikraštė prenumeratuoree, kėtė skaitytuojee sava laikraštė nebsulaukė. Vėituo anuo pasėruodė "Žemaitija". So taas, katrėi lig šiuol skaitė "A mon sakaa?", sosėpažintė nebreek. Vuo tėms, katrėi Žemaitiu kultūras draugėjės leidini pajiemė pėrma karta i ronkas, nuorietomem pasakytė, kad 1991 metu pradiuo Palonguo gėmusi mintės leisté laikraščius ir žornalus žemaitiu kalba, neožgesa. Pradiuo Palonguo bova leidams žemaitišks laikraštis "A mon sakaa?", vuo nu dabaa šiu laikraštė redakcėjė kas ketvirti planou išleisté pu žornala. Redakcėjė diekāvuo vėsėms, katrėi padiejė leisté laikrašti, rašė anam, riemė redakcėjė ir kėtaas būdaas anaa padiejė. Kvėitam bovosė laikraštė bėndradarbius ir tuoliau mums rašytė. I talka kvėitam Žemaitėjės krašta istuorėkus, vėsus, katrėi nuorietom, ka atsitėistu ne tik žemaitišks žuodis, bet ir pats žemaitis. Vuo žornala pabaigu, spausdėnam kelis "A mon saka?" laikraštie onkstiau išspausdintus straipsnius. Tegol anei mums primėn "A mon sakaa?"



VAZBUTA Stasė puortėrapėjuo: pėrmuojė žemaitiška laikraštė "A mon sakaa?" kūrėjee ir leidicjee (iš kairies i dešėnė): Vėišniauskis Jūzaps, Narmonts Augostis, Muklėnė Danutė (redaktuorė), Kasparavičios Stanislavuos, Žebrauskis Algėrds, Pabrieža Jūzaps